

Visoki predstavnik Inzko i njegov prvi zamjenik Scanlan u posjeti Banja Luci



Visoki predstavnik Valentin Inzko i prvi zamjenik visokog predstavnika i supervizor za Brčko Michael Scanlan posjetili su danas Banja Luku, gdje su se sastali sa predsjednikom Republike Srpske Željkom Cvijanović, predsjedavajućim Narodne Skupštine RS Nedeljkom Čubrilovićem, predsjednikom Vlade Republike Srpske Radovanom Viškovićem te predsjednikom SDS-a Vukotom Govedaricom i predsjednikom PDP-a Branislavom Borenovićem.

Na sastancima, tokom kojih je visoki predstavnik iskoristio priliku da predstavi svog prvog zamjenika, razgovori su bili fokusirani na aktuelna politička dešavanja.

Visoki predstavnik Inzko i prvi zamjenik Scanlan podvukli su važnost pune provedbe Daytonskog mirovnog sporazuma kao osnove za političku stabilnost i prosperitet BiH, oba njena entiteta i svih njenih građana, dodavši da je poštivanje principa ustanovljenih Daytonskim sporazumom, uključujući poštivanje institucija, njihovih nadležnosti i odluka, ljudskih prava i temeljnih sloboda, vladavine prava i ekonomskog razvoja, od suštinske važnosti.

“Razumijem da su stavovi o važnim pitanjima sa kojima se ova zemlja suočava različiti u različitim dijelovima zemlje. To je u određenoj mjeri normalno. Istovremeno, uvjeren sam da je

moguće naći kompromise zasnovane na zajedničkim interesima i reformama koje su okrenute ka budućnosti – oko kojih se svi mogu okupiti, poput evropskog puta, ekonomije ili bolje infrastrukture – i koje će poboljšati život građana u Republici Srpskoj i cijeloj Bosni i Hercegovini”, rekao je visoki predstavnik.

Visoki predstavnik Inzko i prvi zamjenik Scanlan također su istakli čvrsto opredjeljenje OHR-a da podrži napore vlasti Republike Srpske da unaprijede institucionalnu stabilnost i ekonomski prosperitet u skladu sa Daytonskim sporazumom.

Galerija slika: